

U Vučjaku 300 novih migranata za samo nekoliko dana



Situacija u prihvatnom centru za migrante na lokalitetu Vučjak, kod Bihaća, sve se više komplikuje i trenutno u tom kampu boravi oko 800 osoba, što je najveći broj dosad.

U Ministarstvu unutrašnjih poslova USK potvrdili su da su samo u proteklih nekoliko dana u ovaj centar dovezli 300 novih migranata koji su se zatekli u gradskom području Bihaća.

“Pripadnici policije nastavljaju realizaciju zaključaka Operativne grupe za migrantsku krizu da se svi strani državljani koji se zateknu u gradskom području Bihaća prebacuju u prihvatni centar na Vučjaku. S tim aktivnostima nastavićemo i u narednom periodu”, ističu u MUP-u USK.

Iz organizacije Crvenog križa Bihaća ukazuju da je situacija postala neizdrživa te još jednom apelovali da im se pomogne u brizi o migrantima.

“Ponoviću po ko zna koji put da smo prepušteni sami sebi, pokušavamo da donacijama obezbijedimo dovoljno hrane za migrante. Šatori pod kojima borave prokišnjavaju, a u ovom trenutku niko ne razmišlja o tome da će uskoro jesen i da ljudi, kada dođu kiše i hladnije vrijeme, neće moći boraviti ovdje”, kaže Selam Midžić, sekretar ove humanitarne organizacije.

Prema njegovim riječima, u brizi o migrantima na Vučjaku potpuno je izostala pomoć međunarodnih organizacija, koje su protiv toga da oni budu smješteni i borave na toj lokaciji.

Dodaje da je jedina pomoć stigla od gradskih vlasti, ali da to nije dovoljno kako bi se zadovoljile sve potrebe.

“Ne znam šta će se dešavati dalje, broj migranata se povećava i doći ćemo u situaciju da nećemo moći brinuti o njima. Pozivam sve nadležne domaće i međunarodne institucije da pronađu adekvatnu lokaciju za smještaj ovih ljudi jer je svima jasno da na Vučjaku neće moći još dugo ostati”, kazao je Midžić.

Vlada USK je prije nekoliko dana predložila da se jedinstveni prihvatni centar za sve migrante koji se nalaze u USK formira na lokalitetu stočarske farme u mjestu Medeno Polje, kod Bosanskog Petrovca.

Međutim, ova inicijativa je naišla na oštro protivljenje predstavnika lokalnih vlasti, a kritike su stigle i od

predstavnik udruženja koja okupljaju povratnike srpske nacionalnosti u Federaciji BiH.

Istaknuto je da bi realizacija te ideje podstakla iseljavanje građana srpske nacionalnosti s tih prostora.

(N.N.)

Date: 16-08-2019